

Mál nr. 32/2014
M og
V vegna fjölskyldutryggingar.

Vátryggðir í fjölskyldutryggingu vegna slyss 14. október 2013.

Gögn.

1. Málskot móttengið 22. janúar 2014 ásamt gögnum.
2. Bréf V dags. 3. febrúar 2014.

Málsatvik.

Eiginkona M er vátryggingartaki fjölskyldutryggingar hjá V. Í vátryggingarskilmálum vátryggingarinnar kemur fram að vátryggðir í vátryggingunni séu vátryggingartaki, maki hans eða sambýlismaki og ógift börn, enda eigi þessir einstaklingar sameiginlegt lögheimili á Íslandi, búi á sama stað og hafi sameiginlegt heimilishald. Fram kemur í gögnum málsins að M og vátryggingartaki séu hjón en M er ekki með skráð lögheimili á sama stað og vátryggingartaki, en hann hefur verið skráður með lögheimili í Noregi síðan á árinu 2012.

M telur að hann eigi að teljast vátryggður þar sem lögheimili hans sé í raun á sama stað og eiginkonu hans í skilningi laga um lögheimili nr. 21/1990. Einnig telji norsk tollayfirvöld hann til heimilis á Íslandi en ekki í Noregi.

V telur að þegar skilyrði fyrir því hverjir eru vátryggðir í umræddri Heimilisvernd verði að líta til opinberra upplýsinga um skráð lögheimili. V telur einnig að vísan M til laga um lögheimili og álits norskra tollayfirvalda á heimilisfesti hans breyti ekki því að hann hafi ekki átt skráð lögheimili á sama stað og vátryggingartaki á tjónsdegi.

Álit.

Skýrt ákvæði í skilmálum fjölskyldutryggingarinnar segir að vátryggðir í vátryggingunni geti meðal annarra verið maki vátryggingartaka sem hefur sama lögheimili og vátryggingartaki. Þó hjón hafi alla jafna sama lögheimili, liggur fyrir í þessu máli að M hafði ekki skráð lögheimili á sama stað og vátryggingartaki, eiginkona hans, þegar hann slasaðist 14. október 2013. Þegar litið er til jafn skýrra skilyrða og þess sem kemur fram í umræddum skilmálum verður að leggja til grundvallar þær opinberu upplýsingar sem liggja fyrir um skráð lögheimili hans. Ekki hafa komið fram skýringar í málinu um að skráning hafi bersýnilega verið röng. Ekki verður því hægt að líta svo á að M hafi verið vátryggður í skilningi vátryggingarskilmála Heimilisverndar þegar hann slasaðist.

Niðurstaða.

M á ekki rétt á bótum úr fjölskyldutryggingu hjá V.

Reykjavík 4. mars 2014.

Þóra Hallgrímsdóttir lögfr.

Valgeir Pálsson hrl.

Jón Magnússon hrl.